

GARAPEN AGENTZIA ZERBITZUAREN BEHIN BEHINEKO BEHARRETARAKO
TEKNIKARIEN LAN POLTSA BAT SORTZEKO HAUTAKETA PROZESUAREN
OINARRIAK

1.- Deialdiaren xedea

Deialdi honen xedea Garapen Agentziako proiektu estrategikoak kudeatzeko teknikarien lan poltsa bat sortzea da. Debagoieneko Mankomunitatean, bitarteko funtzionario bezala, aldi baterako arituko liratekeen teknikariak hautatuko dira.

Lan poltsa hau Euskal Autonomia Erkidegoko beste administrazio publiko batek erabil dezake, Debagoieneko Mankomunitateari hala eskatzen badio eta honek baimentzen badu.

2.- Hautagaien baldintzak

Onartuak izan eta, hala badagokie, oposizio-lehiaketan parte hartzeko, eskaerak aurkezteko epea bukatu baino lehen hautagaien ondorengo baldintza hauek bete behar dituzte:

- a) Europako Batasuneko kide diren estatuetakoren baten nazionalitatea izatea, edota Europako Batasunak egin eta Espainiako estatuak berretsitako nazioarteko Itunen aplikazioaren arabera, langileen zirkulazio askea aplikatzen zaion Estaturen bateko nazional izatea.

Baita ere parte har dezake Europako Batasuneko kide diren estatuetakoren bateko nazionalen ezkontideak, zuzenbidez banatuta ez badago, baita horren ondorengoek eta ezkontidearen ondorengoek ere, betiere bi ezkontideak zuzenbidez banatuta ez badaude, ondorengo hauek hogeita bat (21) urtez beherakoak izan edota zaharragoak izan, baina haren kontura bizi baldin badira.

- b) 16 urte beteta izatea, eta nahitaezko erretirorako gehienezko adina gainditu gabe izatea.
- c) Goi mailako unibertsitate-titulazioa (lizentziatua edo graduatua) izatea.
- d) Lanpostuko eginkizunak betetzea eragotziko dion gaixotasun edo akats fisikorik ez izatea.
- e) Herri Administrazioen zerbitzura lan egiteko debekupean ez egotea zigor-espedienteen ondorioz, edo eginkizun publikoak betetzeko gaitasungabetu edo inhabilitatuta ere ez egotea.
- f) Abenduaren 26ko 53/1984 Legeak —Herri Administrazioen zerbitzuko Pertsonalaren Bateriaezintasunei buruzkoak— ezarritakoaren arabera, ezintasun edo bateraezintasunezko kausa legalen batean sartuta ez egotea, baina lege-arau horrek berorrek aipatzen duen aukera-eskubidea erabil dezakete dagoeneko postu publiko batean daudenek edo bateraezina den jarduera pribatu batean dihardutenek.

3.- Eskariak aurkeztea

Oposizio-lehiaketan onartuak izateko eskariak Mankomunitateko lehendakariari zuzendu behar zaizkio, eta 2014ko urtarrilaren 24aren arratsaldeko ordu biak (14:00) baino lehen aurkeztu behar dira, ondorengo baldintzak betez:

- a) Deialdiaren 2. oinarrian eskatzen diren baldintza guztiak eta bakoitza betetzen dituztela agerrarazi behar dute hautagaiek, eskariak aurkezteko epea bukatzen den datari buruz betiere.
- b) Hautagaiek lehiaketa-aldian balioetsiko diren merituei buruzko datuak agerrarazi behar dituzte. Ez dira balioetsiko eskarian zehazten ez direnak.

Eskariak, eta horien eredia Mankomunitatean emango da, behar bezala beteta eta NAren fotokopiarekin batera, Mankomunitateko Erregistro Orokorrean aurkeztu behar dira, Arrasateko Nafarroa Etorbideko 17an, edota azaroaren 26ko 30/1992 Legeak — Herri Administrazioen Araubidearen eta Guztientzako Administrazio Jardunbideari buruzkoak— 38.4 artikuluan ezartzen dituen moduetakoren batean.

4.- Aurkeztu beharreko agiriak

a) Eskariarekin batera aurkeztu beharrekoak:

- NAren fotokopia, edo Europar Batasuneko beste estatu bateko kideen kasuan, nortasuna eta nazionalitatea egiaztatuko dituen agiriaren fotokopia.
- Hala badagokio, egiaztaturik duen hizkuntza eskakizunaren frogagiria.

b) Aukeratze-prozesuan aurkeztu beharrekoa:

Eskarian alegaturiko merituen egiaztagiriak gero aurkeztuko dira, Epaimahai Kalifikatzaileak adieraziko duen eran eta epean.

Agiri hau oposizio-aldia gainditzen dutenei bakarrik eskatuko zaie.

c) Aukeratze-prozesua bukatzen denean aurkeztu beharrekoak:

Lehiaketa-oposizioan parte hartzeko 2. oinarrian eskatzen diren betebeharren egiaztagiriak gainditu duten hautagaiek bitarteko izendapena baino lehen aurkeztu beharko dituzte, Mankomunitateak eskatzen dizkienean.

d) Agiriak alderatzea:

Parte hartzeko eskatzen diren baldintzak nahiz merituek egiaztatzeko, agiri originalak aurkeztu behar dira beren kopiekin Mankomunitateko Erregistrora ekartzen direnean bertan alderatzeko, salbu NAren kopia, hori eskariarekin batera entregatu behar baita. Kopia originalarekin alderatzea Mankomunitatean bertan egingo da, eta oposizio-lehiaketan parte hartu ahal izateko bakarrik.

5.- Hautagaien onarpena

Eskariak aurkezteko epea bukatzean, hautagai onartuen eta baztertuen behin-behineko zerrendak onartuko ditu Mankomunitateko lehendakariak. Zerrenda horiek Mankomunitateko iragarki-taulan emango dira argitara eta web orrian, www.debagoiena.net, eta 3 laneguneko epea utziko da ez-onartzea eragin duten akatsak zuzendu eta hutsuneak betetzeko, edota zerrenden aurkako erreklamazioak aurkezteko.

Ez bada erreklamaziorik aurkezten, behin-behineko zerrendak behin betiko bihurtuko dira. Erreklamazioak egiten badira, onartu edo baztertu egingo dira beste ebazpen baten bidez, eta honela onarturiko behin-betiko zerrendak lehen adierazitako moduan jarriko dira jende aurrean.

6.- Epaimahai Kalifikatzailea

Honela osatuko da oposizio-lehiaketako Epaimahai Kalifikatzailea:

Lehendakaria

- Garapen Ekonomikorako Eskualde Agentzia Zerbitzuko arduraduna edo honek eskuordeturiko teknikaria.

Mahaikideak

- Garapen Agentziako Enplegu teknikaria edo honek eskuordeturiko teknikaria.
- Bi udal enplegu teknikari.

Idazkaria

- Mankomunitateko idazkaria edo, hala balegokio, bertako Administrazio Orokorreko teknikari bat.

Hautaketa probatan eta hautaketa batzordeko bileretan, Agentziako batzordeko zein Gobernu Juntako kideak egon ahal izango dira; baita langileen ordezkariak ere.

Epaimahaiko kideak Mankomunitateko lehendakariak izendatuko ditu eta izendapen hori Mankomunitateko iragarki-taulan eta web orrian emango da argitara, onartuen eta baztertuen zerrendarekin batera..

Epaimahaiari komenigarri iruditzen zaion probetan, gai bakoitzean aditu diren aholkularien laguntza eskatu ahal izango du.

Herri Administrazioen Araubidearen eta Guztientzako Administrazio Jardunbidearen Legeak 28. artikuluan ezarritako egoeretakoren bat ematen bada Epaimahaiko kideengan, kide horiek ez dute esku hartu behar —Mankomunitateko lehendakariari jakinaraziz— eta hautagaiak ere ezetsi egin ditzakete.

7.- Oposizio-aldiko ariketak

Oposizio-aldiko ariketetarako deiak, Epaimahaiaren ebazpenak eta prozedura honen ondoriozko gainerako jakinarazpenak Mankomunitateko iragarki-taulan eta web orrian emango dira argitara.

Ekitaldi bakoitzerako deialdi bakarra egingo zaie hautagaiei, ezinbesteko kasuetan izan ezik, hauek behar bezala justifikatuta badaude eta Epaimahaiak askatasunez horrela iritzita.

Oposizio-aldian ondorengo ariketak egingo dira:

Lehen ariketa: Euskara proba. Nahitaezkoa eta kanporatzailea. 4. hizkuntza eskakizunaren mailako proba bat egingo da euskararen ezagutza baloratzeko. Oposizilogileek 4. hizkuntza-eskakizunari dagokion ezagutza gainditu beharko dute.

Ariketa honetan GAI edo EZ GAI emango da, eta proba honek barne ondorioak izango dituzenez soilik, Mankomunitateak ez du inolako ziurtagiririk luzatuko.

6/1989 legeak ezarritakoari jarraituz, 4.HE hautagai batek ere ez balu egiaztatuko, lanpostu honi 3HE ezarriko zaio.

Bestalde lan poltsan geratuko dira 3HE egiaztatzen dutenak ere, beti ere 4HE dutenen atzetik, ezagutza ziurtagiri bidez edo bai euskara frogatik bidez egiaztatu ondoren.

Proba hau egitetik salbuetsita egongo dira Euskal Herri-Administrazioetan euskararen erabilera normalizatzeko prozesua aplikatzeko indarrean dauden arauetan aurreikusitako titulu edo agiriren bat dutela egiaztatzen duten oposizilogileek.

Bigarren ariketa: Nahitaezkoa eta kanporatzailea.

Debagoieneko lan merkatua, egitura eta eragile ekonomikoak, enpresa sustatzaileratasuna, lanbide heziketa eta heziketa unibertsitarioaren eskaintzari buruzko proba praktikoa. Ariketa honen gehieneko kalifikazioa 20 puntukoa izango da, eta gutxienez 10 puntu lortu beharko dira gainditzeko.

Hirugarren ariketa: Nahitaezkoa eta kanporatzailea.

Informatika proba. Ofimatikako programa informatikoak eta Internet zenbateraino ezagutzen dituzten balioesteko proba izango da. Ariketa honen gehieneko kalifikazioa 6 puntukoa izango da, eta gutxienez 3 puntu lortu beharko dira gainditzeko.

8.- Lehiaketa-aldia

Merituen lehiaketa aldia ez da kanporatzailea izango, eta hor lortutako puntuazioa ere ezingo da kontuan hartu oposizio aldiko probak gainditzeko.

Epaimahaiak ondorengo merituak balioetsiko ditu, eskaria egiterakoan alegatu eta Epaimahai Kalifikatzaileak eskaturiko unean behar beste egiaztatu baldin badira.

- a) Lanbide-esperientzia enpresa berrien eraketan, enpresa saretze prozesuetan, eta garapen ekonomikoarekin erlazionaturiko proiektu kudeaketan. Puntu 1 balioetsiko da, urtebetetik gora lan egindako urte bakoitzeko, gehienez 5 punturaino.
- b) Prestakuntza osagarria hartu nahi den lanpostuari dagozkion eginkizunetarako. Gehienez ere 3 puntu.

Atal hau honela balioetsiko da:

Tokiko garapen sozioekonomikoa, enpresa eta ezagueraren sustapena eta kudeaketa eta pertsonen garapen sozio-profesionalarekin zerikusirik dituzten ikastaroak (50 ordu baino gutxiagoko ikastaroak ez dira baloratuko). Ikastaro bakoitzeko puntu 1. Gehienez ere 3 puntu.

Aurreko ataletan aipaturiko lanbide-esperientzia INSSk egindako frogagiriaren bidez eta egindako lanen ziurtagiriaren bidez egiaztatuko da.

9.- Epaimahaiaren proposamena

Hautagai bakoitzaren azken kalifikazioa lehiaketa eta oposizio aldietan lorturiko puntuen batura izango da, eta honela ezarriko da azken puntuazio-ordena,

Merituen eta ariketen kalifikazioa bukatu ondoren, eta azken puntuazio-ordenaren arabera, Epaimahaiak argitara emango du probak gainditu dituzten hautagaien zerrenda.

Epaimahaiak Mankomunitateko lehendakaritzari emango dio zerrenda hori aldi baterako lan poltsatzat erabil dezan.

Lanean hasi aurretik, oposizio-lehiaketan parte hartzeko 2. oinarrian eskatzen diren baldintzen egiaztagiria Mankomunitateko Idazkaritza Nagusian aurkezteko eskatuko zaie prozesua gainditutako zerrendan dauden hautagaiei.

Ezarritako epean, eta ezinbesteko kasuren batean izan ezik, proposaturiko hautagaiek ez badute eskaturiko dokumentazioa aurkezten edo, aurkeztutakoa aztertu ondoren, baldintzaren bat ez dutela betetzen ikusten bada, ezingo dira horiek kontratatu, eta bertan behera geratuko dira berari buruzko jarduketa guztiak, faltsukeriagatik izan dezakeen erantzukizunaz gain.

10.- Gorabeherak

Epaimahai Kalifikatzaileak ahalmena du edozein zalantza argitzeko eta oposizio-lehiaketa ongi gauzatu dadin beharrezko erabakiak hartzeko, Oinarri hauetan ezarri gabeko guztian.

11.- Aurka egiteak

Deialdi honen, beronen oinarrien eta ondorengo administrazio-egintzen eta Epaimahaiaren jardunaren aurka, abenduaren 26ko 30/1992 Legeak —Herri Administrazioen Araubidearen eta Guztientzako Administrazio Jardunbideari buruzkoak, urtarrilaren 13ko 4/1999 Legeak aldatuta— eta Administrazioarekiko Auzi Eskumena arautzen duen Legeak ezarritako kasuetan eta eran egin ahal izango da.